



Komunikadu Imprensa
Tribunál Distritál Oe-Cusse
31 Marsu 2015

Tribunál Distritál Oe-Cusse kondena maioria arguidu sira ba krime violénsia doméstika ho suspensaun ba pena prizaun

Iha 09-27 Marsu 2015, Tribunál Distritál Oe-Cusse julga kazu ofensa ba integridade fízika simples ho natureza violénsia doméstika 6 hosi total kazu 11 ne'ebé mak JSMP observa iha tribunál ne'e no maioria tribunál konklui ho suspensaun ba pena prizaun.

Hosi kazu 6 ne'e, iha kazu hamutuk 4 mak tribunál kondena ho suspensaun ba pena prizaun no kazu 2 seluk kondena ho pena multa.

“JSMP observa dala barak ona katak suspensaun ba pena prizaun ladun iha efeitu preventivu tanba kondenu sira hanoin katak suspensaun hosi pena prizaun la'os forma ida hosi sentensa kriminál. JSMP hanoin katak sei tribunál konsidera katak se suspensaun mak forma ida apropriadu ba krime violénsia doméstika, tribunál tenke inklui dever adisionál iha sentensa ne'e nia laran, Diretór Ezekutivu JSMP, Luis de Oliveira Sampaio”.

Iha tinan sira liuba kotuk, JSMP observa katak maioria kazu sira violénsia doméstika konklui ho pena multa no JSMP hanoin katak dala ruma pena multa la'os pena ne'ebé apropriadu ba kazu violénsia doméstika, tanba sei fo todan no prejudika liu ekonomia familia sira.

Normalmente familia sira iha área rural, inan ka feen sira mak maioria fila liman tun-sae atu hetan osan hodi sustentan sira nia familia. Tanba ne'e lajustu se osan ne'ebé sira hetan tenke selu fali ba tribunál depoisde sira sai tiha ona vítima ba kazu violénsia doméstika husi sira nia laen. Tanba ne'e JSMP rekomenda ba tribunál atu promove indemnizasaun sivíl ba vítima violénsia doméstika sira duke kondena ho pena suspensaun ka pena multa.

Aleinde kazu 6 ho natureza violénsia doméstika ne'e, iha kazu ofensa ba integridade fízika simples 5 mak tribunál kondena ho suspensaun ba pena prizaun 1, kazu 2 kondena ho pena multa, kazu 1 omologa no kazu 1 seluk tribunál kondena ho pena efetivu iha prizaun. Aleinde ne'e iha kazu ida involve maus-tratus ba menór mak sei iha faze primeriu interogatoriu no tribunál aplika medida koasaun prizaun preventiva.

Rua setubal, Colmera, Dili Timor Leste

PoBox: 275

Telefone: 3323883

info@jsmp.minihub.org

www.jsmp.tl

Facebook: www.facebook.com/timorleste.jsmp

Twitter: @JSMPtl

Prosesu julgamentu hirak ne'e prezide hosi juis singular, Dr. João Ribeiro, ministériu públiku reprezenta hosi Dr. Ambrosio Rangel Freitas no arguidus hetan defeza hosi Dr. Afonso Fatima Gomes no Dr. Calisto Tout hosi Defensória Públiku.

“Kommunikadu imprensa ida ne'e bele imprimi tan ho apoiu jenerozu husi povu Amerikanu liu husi Ajensia Estados Unidos ba Dezenvolvimentu Internasionál (USAID) bazeia ba Akordu Kooperasaun ho Númeru AID-486-A-13-00007 ba programa Ba Distrito iha Timor-Leste, ne'ebe nia implementasaun lidera husi Ajensia Counterpart International ho nia parseiru sira. JSMP mak responsabiliza tomak ba konteudu no hanoin iha komunikadu impresna ida ne'e nia laran no la nesesariamente refleta USAID ka Governu Estados Unidos Amerikanu nia opiniaun”.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org